

129.
COLLEGÆ AMANTISSIMO
CIVI OPTIMO
MEDICO EXPERTISSIMO
B. N. BERTRAND,
DOCTORE MEDICO PARISIENSI,

S. D. A. PETIT.

COLLEGA CLARISSIME,

ANIMI tui candor, fortitudo & constantia, ingenii dotes eximiae, atque virtutes, quas colis, omnigenae me tibi, jam à longo tempore, suavissimam devinxerunt necessitudine, cujus ut publicum extaret monumentum hanc qualemcumque Theſim nomini tuo ſacram volui.

Dabam Lutetiae Parisiorum die 26^a mensis Martii A. R. S. H. 1772.

QUÆSTIO MEDICO-CHIRURGICA,
QUOD LIBETARIIS DISPUTATIONIBUS;
*manè discutienda in Scholis Medicorum, die Jovis secundâ
mensis Aprilis, anno Domini M. DCC. LXXII.*

**M. ANTONIO PETIT, in Horto Regio Anatomies
& Chirurgiæ Professore, Regiæ Scientiarum Academiae
Parisiensis & Stokolmiensis Socio, & Militarium Regni
Nosocomiorum Inspectore, Theſeos Autore, Doctore
Medico, Præsidente.**

*An plumbea lamellâ sub cutim novâ arte insinuatâ rectius, tutiusque quam alio quovis artificio
contineantur in sede partes, quæ prolapsu suo hernias facere solent?*

I.



AB ET suum una quæquæ morbi species incommodi genus, specialemque affert calamitatem: herniæ autem cuncta ferme collecta tenent infortunia. Etenim graves illæ non solum suscitant aliquando dolores, sed etiam ægritudinem constituunt chronicam, habituales, tardii ærumnarumque adeò plenam, ut qui experiuntur illam tristes brevi evadant, ac morosi. Mares sapiens, atque juvenes, laxioribusque fibris donatos adoriuntur herniæ, nulli tamen

parcunt ætati, temperamento, sexui, regioni, & miseros, quos torquent, ægros in proximum vitæ discrimen nonnunquam adducunt. Circa partes, quas velare pudor amat, sedem vulgò ponunt, ibique immanes aliquando procreant tumores: nativam abdominis formam lædunt temper; vires sæpè sæpius frangunt, nec assuetis corpus exerceri laboribus patiuntur: tandem hisce malis aliquid turpe inesse plerique persuasum habent.

Hernia, sive *ramex* vocatur tumor circumscriptus ad infimi ventris superficie natus, qui pendet à dimotione & prolapsu quarumdam partium internarum: verùm partes inter, quas abdomen continet, etsi nulla ferè sit quæ sedem relinquere & extra cavitatem pelli non possit, illæ tamen quæ majori donantur mobilitate, ut intestina & omentum, herniis locum dant frequentius, sive prorumpant ad extra per umbilicum, vel per illam abdominalem musculorum aperturam, quam *annulum* vocant, vel aliâ quâcumque viâ. Multiplicem esse herniarum speciem nemo non novit: discrepant enim inter se vel ratione loci, quem occupant, vel prolapsarum partium naturâ, structurâ, connexione, & usu. Differunt etiam tumoris amplitudine, formâ, consistentiâ, diuturnitate, modo quo tumor natales duxit, atque præsertim accidentibus quæ herniis supervenire non ità rarò observantur. Quæ spectant ad herniarum causas, symptomata, diagnosim, & prognosim missa impræsentiarum facimus ex proposito, utpotè quæ legi & edisci queant apud omnes rerum medicarum scriptores: de earumdem curatione tantummodo differere est nobis animus. Porro in illâ instituendâ duplicem sibi proponunt scopum practici... primò prolapsas partes, eâ quâ convenit arte pristinam restitunt in sedem, quo factò, de *continendis*, ut aiunt, visceribus solliciti sunt, sive, quod idem est, omni ope atque operâ illas à novâ dimotione defendere satagunt, atque in hunc finem diversis utuntur mediis, quorum præcipua sunt corporis situs, medicamentorum usus tum internus, tum externus, ligatura, sectio, ustio atque subligaculorum omne genus; ut autem certum de re propositâ ferre valeamus iudicium, necessarium utique nobis videtur de commodo & incommodo unius cujusvis mediî pauca hic loci præmittere.

I I.

MEDICAMENTA ad herniarum curationem usurpata, ad hunc collimant scopum singula, ut fibris aperturam ambientibus illud concilietur robur, quo prementibus resistere valeant visceribus, atque eorum exitum prohibere: illa autem de tonicorum, necnon adstringentium familiâ depromi solent, & quæ majori commendantur efficacîâ sunt spiritus salis marini cum vino mixtus, herniaræ succus vel decoctum, emplastrum contrâ rupturam & alia hujusce modi; verùm experimentis compertum habemus hæc medicamina junioribus administrata felicem non numquam sortita fuisse effectum, atque eorum ope nonnullas sanatas vidimus hernias, at, dicam quod res est, rarissimæ se se nobis observantibus obtulère hujusmodi sanationes, quæ in adultis rarius multò deprehenduntur; & proinde non parum à vero

declinaret ille, qui petendam sperandam ve ut plurimum ab astringentibus ramicis integram curationem sibi fingeret.

In simplicioribus herniis solent deciduæ partes pristinam spontè reperere sedem atque ad interiora revocari, quando resupinus jacet æger, sive id fiat nisu partium internarum quæ prolapsas & sibi continuas trahunt ad se, sive res accadat vi externarum, quæ contentas in herniali tumore premunt; sed simul atque surgit ægrotus, ambulat, aut aliquam conatur actionem edere, rursus prorumpunt illæ & malum renascitur. Optima proinde ad reductionem dimotarum partium via est laudatus corporis situs: sed illum diu noctuque assidue servare, sicque integram ducere vitam, arduum planè, rectius dicam, impossibile videtur; inde concludere fas est illum vix annumerari debere inter media quæ recidivam præcavere queunt.

Quod situ corporis obtinere non possunt, illud certis quibusdam in casibus ligaturâ comparare tentaverunt Chirurgi. Filo scilicet aureo, aut alio quovis, vasorum spermaticorum funiculum unâ cum Ramicis sacco, juxta muscutorum annularem aperturam comprehendunt; filum deinde nodo constringunt ita ut claudatur ostium, ibique ponatur obex cujus deinceps resistèntia superari nequeat nisu viscerum in infimo ventre contentorum, & tamen liber remaneat sanguinis ad testes aditus. *Punctum aureum* hanc ligaturæ speciem vocaverunt. At illa multum mali, nilque secum asferre solet emolumenti; etenim si laxior sit ligatura non obstat partium dimotioni atque recrudescit morbus, fitque periculosior. Si sufficienter constringatur filum, tunc temporis sanguini præcluditur ad testiculos via, unde brevi cessat eorum actio, imo vita in illis sufflaminatur, & ideo damnamam & prorsus ablegandam methodum istam uno ore pronuntiarunt Medicorum filii.

Scelesti visi fuere, & proh pudor! Videntur adhuc dum circulatores, qui ad sanandas hernias in infantibus testes arte nefandâ rescare non dubitant. Verùm argumentis confutandi non sunt hujusce farinæ nebulones, sed politicis veniunt tantum coercendi legibus, debitisque pœnis afficiendi. Etenim ad procreandos liberos fiunt impares, qui hanc operationem sustinere: itaque pro generis humani hostibus habendi sunt qui talia patrare audent.

Sunt qui causticis curationem herniarum aggrediuntur, contenduntque morbum tutius hisce remediis quam aliâ quâvis methodo perfanari. Cum enim constet observatis molles corporis nostri partes inflammatione tentatas mutuo coalescere posse, & post sedatam inflammationem firmiores remanere, inde factum fuit ut de concitandâ inflammatione in abdominalis aperturæ laxiori margine cogitaverint, quâ scilicet glutinari, invicemque possent coalescere ostii ora atque desideratam comparare firmitudinem. Idcirco causticum lapidem, aut aliud ejusdem efficaciam medicamen applicant, cujus vi corrosivâ cutis non solum & subiecta cellularis tela, sed & ipsæmet

herniæ saccus consumuntur. Post aliquid temporis separantur à vivis partes quæ caustici actionem expertæ fuere, atque, ut ajunt, eschara decidit, in suppuratum vulnus abit, & sensim inter se uniuntur soluti sacci hernialis labia, hærent ad circumferentiam abdominalis aperturæ, unâ eâdemque junguntur cicatrice, quæ vices scuti gerens sustinet irruentium partium impetum, ac descensum prohibet illarum. Ingeniosa quidem methodus ista, sed illam multiplici vitio premi non negandum. Acutos enim diuturnosque dolores causticum excitat, & quamvis industriâ tractetur manu nequit ejus actio ita coerceri, & tam præcisè circumscribi, quin aliquando sentiatur à partibus quas lædere piaculum foret, & inde narrant gravissima mansisse nonnunquam accidentia: volunt & etiam hanc agendi rationem minimè tutò sanare, atque non semel accidisse ut, qui pulsus credebatur, hostis ex improvviso ingrueret, novas & periculi plenas ederet strages. Absit autem ut exinde penitus ablegandam esse concludamus, sed antequam prudentioribus illam liceat in usum vocare, expectandum utique nobis videtur donec favente peritorum industriâ perfectior evadat atque in dies comprobetur.

I I I.

SEXCENTA inter salutis media quæ sagax in commune bonum contulit neotericorum solertia, non infimam profectò sedem tenent subligacula, cingula, aut Bracheria quæ Gallis *Brayers*, *Bandages*. Multiplicis autem illa generis esse nemo est qui non noscat. Tribus unum quodque constat partibus, globo scilicet, qui & caput & scutum audit, quo Musculorum ita claudicatur hiatus, ut ab interioribus ad exteriora nullus pateat aditus; modicâ donari debet consistentiâ ne duritie nimîâ partes lædat quas comprimit, aut propter majorem mollitiem cedat partibus internis atque earum permittat è ventris cavo effluxum. Corpus subligaculi pars est media, ægri quæ corpus ambit & diversimodè conficitur: vel enim linamentis constat, vel corio, vel ebore, vel ferro, &c. prioris generis, ea nempe quæ corpus habent ex linamentis comparatum, ad continendas infantum hernias solent usurpari; sed sapissimè cum malis ægrotantium rebus. Quando quidem linamentorum brevi laxatur compages, quo fit ut levior, quam par est, fiat ad ventrem compressio, inde minimâ de causâ foras pelluntur intestina, sub globo cinguli se se insinuant, illo premuntur, & vexantur adeo ut dira hinc enascantur tormina, quæ in causâ sunt cur sanitas & ipsamet nonnunquam infantis vita in præceps ruant. Quibus moti rationum momentis primam hanc subligaculorum speciem rejiciendam esse censemus. Idem fermè dicendum de istis cingulis quæ corpus corio paratum gerunt. A longo jam tempore prorsus obsolevit subligaculorum ex ebore confectorum usus. Illa nempe frequentius faciliusque rumpuntur, corporis circumferentiæ aptantur difficilius, atque imperfectè herniale ostium sæpe sæpius claudunt. Cæteris ergò omnibus præstant ferro fabrefacta, imprimis si idoneâ donentur elasticitate; in eo specialiter alia superant, quod, dum flectitur corpus, aut certis quibusdam

in circumstantiis situm mutat, cæterorum cingulorum actio cesset, constanter autem tunc temporis perseveret & exerceatur illa quæ elasticis propria est cingulis.

Plurima dubio procul & quidem maximi momenti commoda his potissimum posterioribus instrumentis debentur; sed casus non desunt in quibus locum obtineri nequeunt, quia etiam si sint & scitè fabricata & appositè collocata indicationi tamen satis facere non possunt, id est prolapsum interaneorum non prohibent; siue istud accadat propter nimiam corporis obesitatem, grandio rem ve ventris hiatum, aut flaccidiorem atque humidiores partium texturam, siue res ab aliâ pendeat causâ, cujus indagationi vacare non sinit instituti nostri ratio; nobis impræsentiarum sufficiat animadvertisse, longè satius esse memoratis in casibus à cingulis abstinere, quam illa vocare in usum: nam visa sunt non semel intestina sub cinguli globum foras prodeuntia, quæ illius pressione inflammationem concepere, & indè gravissima, imò lethalia orta fuisse symptomata constar, & quæ machina salutis instrumentum esse debuisse, in perniciem ægri versa, mortis facta fuit causa.

I V.

EX illis, quæ in medium huc usque adduximus, argumentis liquet nullum ætate nostrâ propositum fuisse artificium, quod ab omni vitii labe prorsus immune dici possit. Novam idcirco methodum excogitavimus, quam cæteris existimamus præsentio rem, quamque propter ea publici juris facere opere pretium duximus. Num autem nostra nos sefellerit opinio, atque in errorem induxerit summum, quod colimus, communis utilitatis studium, iis dijudicandum relinquimus quibus de Medicis ac Chirurgicis rebus est jus & mos pronuntiandi. Si scopum, ex illorum sententiâ, tangere datum fuit, gaudebimus, non gloriabimur: sin minus, dolebimus, non erubescemus; errare enim humanum est, & soli debent illi erubescere quorum mens male sana nil cogitat aut meditatatur nisi quod nocere bonis arbitrantur.

Sic autem nova se habet methodus nostra. Resupinus in dorso primum collocari debet æger, elevatis nonnihil femoribus, hocque in situ appositis contineri ministris. In ventrem deinde solerter reducendæ venient partes prolapsæ; quo facto, suprâ hernialem aperturam scalpello vulgationi cutis plus minus ve incidenda est, prout minor aut amplior subjecta deprehenditur apertura atque majori vel minori obesitate corpus onustum observatur. Sectâ cute, ita ad aperturæ ambitum textum cellulare inciditur ut nuda in conspectum veniat apertura. Si, ut fieri solet, sacculus adsit hernialis, & aliquâ crassitudine donetur, illico aperiendus est secundum longitudinem suam; verum si tenui constet pelliculâ, integer absque incommodo remanere potest. His omnibus peractis sub cutim & telam adiposam, immediatè suprâ ostium herniale vi quâdam digitum lamella plumbea, ibi per reliquum vitæ spatium remansurâ, sufficit autem ut illa lineæ circiter crassitudinem gerat. Quod verò ad illius amplitudinem formamque spectat, utraque

varia debet esse. Amplior etenim sit lamella necesse est, quando abdominalis apertura major & vice versâ. Antequam opus aggrediatur Chirurgus, facili de negotio convenientem poterit determinare propositæ lamellæ magnitudinem: satis utique erit si hujus circumferentia unius transversî digiti latitudine ostiî ambitum excedat. Forma autem ad rotundam accedat, si ramex sit, in umbilico; si in inguine, ovalis erit, & in uno extremo truncata, id est cordis figuram habebit, & ita collocabit eam Chirurgus, ut scissurâ, quam gerit in extremitate, comprehendatur vasorum spermaticorum funiculus. Post dispositam in loco lamellam, adducenda sunt vulneris ora, atque filo, aut alio quovis modo ita continenda, ut brevi temporis intervallo glutinari, atque legitimâ cicatrice uniri valeant. Necessarium est præterea ut in decliviori vulneris parte mollis insinuetur turundula; eâ scilicet mente, ut, si quid stillat suppurati humoris, ipsi via pareatur; nec debet illa extrahi & supprimi nisi post perfectam vulneris consolidationem. Denique, ut solet fieri similibus in casibus, tractabitur vulnus, id est balsamicis primûm, digestivis deinde utendum est: dantur insuper, ut moris est, spleniola quæ congruâ deligatione continentur. Per totum curationis tempus oportet ut ager lectum teneat, moderato utatur victu, motibus parcat, atque, absolutâ curatione, per menses aliquot à laboribus, violentisque exercitiis abstineat.

V.

OPTIMUM illud vocatur remedium quod *tutò citòque* sanat ac *jucundè*. Porro nostram methodum hæc præstare singula arduum nobis non erit demonstrare, ac primò quidem sanat tutò; nam quæ inter operandum secantur partes, cutis scilicet, cellularis tela, atque ramicis sacculus, incidi possunt absque periculo, & reipsâ grandiores fiunt quotidie continui solutiones, à quibus nullum exsurgit symptoma grave; cur igitur nostro in casu ventura pertimesceres accidentia, cum & ampla non sit tegumentorum sectio, atque chirurgi peritâ manu celebretur?.... Aliundè simul atque cicatrice unita semel fuere vulneris ora, musculorum aperturæ lamella exquisitiùs aptatur, hancque claudit ita ut nullus deinceps intestinis aut omento concedatur exitus; illa licet maximâ vi pellantur, firmiter resistit lamella, impetum frangit, & faciliùs in aliâ ventris regione disruptio fieret, quam in illâ quæ nostra fuit arte munita; adde quod eadem lamella consimilem operetur effectum, sive corpus inclinetur, vel genua flectantur, aut alium quemcumque situm truncus teneat. Verùm quæ tam confidenter hic loci asseverare non dubitamus, illa nos docuit suprema rerum medicarum magistra, nempe experientia, & idè cum nullus occurrat recidivæ metus, atque ab operatione nil expectandum mali, inde licet colligere nostram tutò, meliùs dicam, tutissimè artem sanare; quod autem præstat tutò illud idem citò perficit. Brevissimo namque temporis intervallo operatio peragitur, brevi cicatrix inducitur, brevi tandem integræ sanitati restituitur æger;

nec longa cingulorum tædia habet sustinenda, nec vexatur diuturnitate molestiarum, quas creare solent antequam illorum usui assuefactus fuerit: quibus patet, ni fallor, laudatam methodum citò non minus quam turò scopum attingere. Praterèa curatione absolutà nil amplius remanet incommodi. nullum doloris sensum suscitât lamella, & de illius existentia solum-modò monetur ac cogitat qui hanc gerit, cum se à morbo liberatum sentit; non ampliùs illi neceffe est manè corpus cingere machinâ, non ampliùs illam habet serò à corpore separandam; non illi pertimescendum deinceps nè rumpatur in viâ, nè dimoveatur à sede, nè intestinorum permittat effluxum, nè lardat effusa, &c. est ne igitur in rerum naturâ res jucunda magis quam illa quæ dolores fugat, curas tollit, ac periculi metum omnem arcet? Jucundè ergò malum nostrâ pellitur arte. Objiciet nobis forsitan aliquis à lamellâ sub cutim introductâ, tamquam à corpore extraneo in plagâ delitescente, nonnulla exoriri posse mala. Nostrum objectioni responsum paucis accipe. Constat ex cadaverum sectionibus glandes plumbeas per longissimum vitæ spatium intra corporis cavitates, quin & ipsas inter carnes, absque ullo incommodo remanuisse; sed pluris facienda est hic loci experientia; illâ autem comprobatum habemus rem feliciter tentatam, prosperoque successû donatam fuisse. His itaque rationum momentis adducti concludemus:

Ergo plumbeâ lamellâ, sub cutim novâ arte introductâ, rectius & tutius, quàm ab alio quovis artificio continentur in sede partes, quæ prolapsu suo hernias facere solent.

DOMINI DOCTORES DISPUTATURI.

M. Joannes - Stanislaus
MITTIE, Regiæ Scientiarum & Litterarum Nanciei Academiæ Socius, necnon Stanislaus I. Poloniarum Regis, dum viveret, Medicus ordinarius.

M. Carolus-Ludov.-Franciscus ANDRY, Chirurgiæ Gallico Idiomate Professor designatus.

M. Matheus-Thomas LA CASSAIGNE, Scholarum Professor designatus.

M. Joannes-Baptista-Alexander MAIGRET.

M. Josephus PHILIP, Scholarum Professor.

M. Joannes D'ARCEY.

M. Ludovicus PATHIOT.

M. Franciscus BIDAULT, Scholarum Professor designatus.

M. Joannes-Claudius MUNIER, Consiliarius Medicus Regis ordinarius & Domus Regiæ Invalidorum.

Proponebat Parisiis CAROLUS LUDOVICUS VARNIER, Parisinus, Monspelienfis Ludovici Doctor Medicæ, necnon Saluberrimæ Facultatis Medicinæ Parisiensis Baccalaureus.

H. 1772. A SOLA AD MERIDIEM.

Typis C. G. L. Typographi. 1772.